



La canzone è stata presentata nel 1937 alla Piedigrotta della «Bottega dei 4». Lo spartito è stato messo a disposizione dall'Archivio storico della canzone napoletana della Rai-Tv.



## L'ammore s'è affacciato

Musica di **Gaetano Lama**

### I

Scuntenta e triste 'a luna,  
vasata 'nfronte da 'nu sciato 'e viento,  
dicette: ma pecché?  
pecché stasera nun so' cchiù d'argiento?  
Si 'a luna 'o vvò sapé, dicimmencello:  
Luna scuntenta ohè!  
Luna scuntenta ohè!  
a nenna 'a vo' 'n'ammore assai curtese,  
tanto curtese neh!  
tanto curtese neh!  
ca quanno 'a vasa 'a cerca primma scusa,  
ma nenna po' risposta ha ditto: Oj core,  
ll'ammore assai curtese nun è ammore.

### II

...E n'ata sera 'o cielo,  
pur'isso malinconico e 'ncantato,  
dicette: ma pecché?  
pecché stasera nun so' mbrillantato?  
Si 'o sole 'o vvò sapé, dicimmencello:  
Cielo scuntento ohè!  
Cielo scuntento ohè!  
a nenna 'a vo' 'n'ammore buono e doce,  
tanto ch'è doce neh!  
tanto ch'è doce neh!  
c''a dice sempre «sì» p''a fa felice,  
ma nenna po' risposta ha ditto: Oj core,  
ll'ammore troppo doce nun è ammore.

### III

Se so' scetate 'e ccase,  
ll'ammore s'è affacciato a 'na fenesta  
e o munno vo' sapé,  
pecché stanotte 'o munno sona a festa.  
Si 'o munno 'o vvò sapé, dicimmencello:  
'Na ricca sciorte ohè!  
'Na ricca sciorte ohè!  
'sta vota 'a nenna 'a vo' 'n'ammore ardente,  
tanto ch'è ardente neh!  
tanto ch'è ardente neh!  
ca 'e vasa songo amare comme 'o chianto,,  
e nenna ha ditto sì, core 'e 'stu core,  
ll'ammore amaro: chisto è 'o vero ammore.